



Stichting MUSICA cu tributo na Nando Browne



ORANJESTAD (AAN): Stichting Musica ta extende su profundo condolencia y palabranan di forsa y sosten na e famia, amigonan musical y ser kerinan di e gran artista local, Nando Browne.

Nando Browne tabata conoci pa su forma di presenta masha energetico, su voz versatil cu tabata cubri diferente rango y genero e.o. Soca, Reggae, R&B, Dancehall y tur otro estilo di musica Caribense.

E noticia di su fayecimento

a tuma nos organizacion di sorpresa y sigur ta laga nos reflehá riba e aporte grandi cu Nando Browne a duna na Carnaval di Aruba y na Aruba Caiso & Soca Monarch (antes conoci como Calypso & Roadmarch contest). Nando a participa na varios ocasion bao di e number “Mighty Breaka” y a sa di destaca como cantante, compositor, entertainer y simplemente un tremendo persona. Ademas di esaki, Nando a guia varios mucha y hoben den nan participacion na festivalnan infantil y hubenil cual sigur ta algo di aprecia.

Un mucha homber humilde y respetuoso cu a lanta na San Nicolas a crece y bira un talento valioso pa nos Carnaval y mundo musical en general. Como integrante di diferente banda y agrupacion manera Basic One, Musical Time, Chupz Band,

Chrome Band, Impak Band y colaboracion extenso cu varios artista y banda local y internacional manera Le Groove, Michael Lampe, Junior Tecla y te na final cu su mesun banda The Fyah Band na hermana isla Curaçao, su legacia sigur lo sigui biba den nos comunidad y Caribe.

Stichting Musica tambe kier a gradici Organizacion SMAC pa awe dedica e Jouve na Number di Nando Browne, y na inicio di parade ta pidi tur banda musical y pueblo en general pa 1 minuut di silencio, nos di Stichting Musica board y su musiconan ta bisa, danki p’e reconocimiento aki.

Nos ta desea tambe tur bandanan un bon participacion y celebra bida y Jouve mane Nando Browne a desea. Su musica lo yega curazon di tur hende atraves di boso.